



**НИЙСЛЭЛИЙН ЗАСАГ ДАРГЫН
ЗАХИРАМЖ**

2005 оны 3 сарын 14 өдөр

Дугаар 89

Улаанбаатар хот

**Авто замын газрын дүрмийг
батлах тухай**

Монгол Улсын "Засаг захиргаа нутаг дэвсгэрийн нэгж, түүний удирдлагын тухай хууль"-ийн 28 дугаар зүйлын 1.3 дугаар заалт, "Авто замын тухай хууль"-ийн 6 дугаар зүйл, Засгийн газрын 2005 оны 15 дугаар тогтоолыг үндэслэн **ЗАХИРАМЖЛАХ НЬ:**

Нэг. Нийслэлийн Засаг даргын хэрэгжүүлэгч агентлаг "Нийслэлийн Авто замын газар"-ын дүрмийг хавсралтаар баталсугай.

Хоёр. Нийслэлийн Засаг даргын өмнө дүрмээр хүлээсэн үүргээ бүрэн хэрэгжүүлж, батлагдсан орон тооны хязгаарт багтаан албан хаагчдыг томилох, цалин нэмэгдлийг зохих журмын дагуу тогтоох, байгууллагын дотоод журмыг боловсруулж батлан мөрдөж ажиллахыг Авто замын газар /Х. Энхтайван/-т үүрэг болгосугай.

Гурав. Нийслэлийн Засаг дарга бөгөөд Улаанбаатар хотын Захирагчийн сонгуулийн бүрэн эрхийн хугацаанд хэрэгжүүлэх үйл ажиллагааны хөтөлбөр, түүнийг хэрэгжүүлэх арга хэмжээний төлөвлөгөөг болон энэхүү захирамжийн биелэлтэнд хяналт тавьж ажиллахыг Нийслэлийн Засаг даргын Тамгын газар /Ц.Болдсайхан/-т үүрэг болгосугай.

4. Энэ захирамж гарсантай холбогдуулан Нийслэлийн Засаг даргын 2004 оны 370 дугаар захирамжийн 5 дугаар заалтын зам замын байгууламжтай холбогдох заалтуудыг, Нийслэлийн Засаг даргын 2004 оны 378 дугаар захирамжийн 3 дугаар хавсралтыг тус тус хүчингүй болсонд тооцсугай.



**НИЙСЛЭЛИЙН ЗАСАГ ДАРГА
БӨГӨӨД УЛААНБААТАР
ХОТЫН ЗАХИРАГЧ**

М.ЭНХБОЛД



Нийслэлийн Засаг даргын 2005 оны
3... сарын 14...ны өдрийн 89
дугаар захирамжийн хавсралт

НИЙСЛЭЛИЙН ЗАСАГ ДАРГЫН ХЭРЭГЖҮҮЛЭГЧ АГЕНТЛАГ АВТО ЗАМЫН ГАЗРЫН ДҮРЭМ

Нэг. Нийтлэг үндэслэл

1.1. Нийслэлийн Засаг даргын хэрэгжүүлэгч агентлаг Авто замын газар /цаашид "газар" гэнэ / нь Монгол улсын Засгийн газар, Нийслэлийн Засаг даргын үйл ажиллагааны хөтөлбөрийн дагуу авто зам, замын байгууламжийг барих, засварлах, арчлан хамгаалах, ашиглалтад хяналт тавих, нийслэлийн авто замын санг бүрдүүлэх, гэнэтийн болон байгалийн гамшгийн улмаас авто зам, замын байгууламжид гарсан эвдрэл саатлыг засварлан сэргээх ажлыг зохион байгуулах, авто замын үйлдвэрлэлийн баазыг бэхжүүлэх, технологийн хяналтыг хэрэгжүүлэх, Улаанбаатар хотын авто зам, замын байгууламжийн бүртгэл мэдээлийн санг байгуулж ажиллуулах үүрэг бүхий өөрөө өөрийгөө санхүүжүүлэх зарчмаар хотын Захирагчийн эрхлэх асуудлын хүрээнд ажиллах Улсын Үйлдвэрийн Газар мөн.

1.2. Газар нь үйл ажиллагаандаа Монгол Улсын Үндсэн хууль, Нийслэлийн эрх зүйн байдлын тухай хууль, Төрийн болон орон нутгийн өмчийн тухай хууль, Авто замын тухай хууль, Компаний тухай хууль болон бусад холбогдох хууль тогтоомж, Нийслэлийн Иргэдийн Төлөөлөгчдийн Хурлын Тэргүүлэгчдийн тогтоол, Нийслэлийн Засаг даргын үйл ажиллагааны хөтөлбөр, захирамж болон энэхүү дүрмийг удирдлага болгоно.

1.3. Газар нь Нийслэлийн Засаг дарга, түүний орлогч, Тамгын газарт ажлаа тайлагнана.

1.4. Газрын орлого нь аж ахуйн тооцооны үндсэн дээр улсын үйлдвэрийн газрын эрхтэйгээр бие даан үйл ажиллагаа явуулж, авто замын хяналтанд зарцуулсан хөрөнгө, хотын доторх зам талбайн түрээсийн төлбөр, авто замын материалын үйлдвэрлэл, судалгаа шинжилгээний болон бусад ажил үйлчилгээний орлогоос бүрдэнэ.

1.5. Газар нь еөрт олгогдсон эд хөрөнгийн үндсэн дээр өөрийгөө санхүүжүүлэх зарчмаар ажиллаж бие даан иргэний гүйлгээнд ордог хуулийн этгээд мөн.

1.6. Газар нь тогтоогдсон журмын дагуу хийгдсэн тамга тэмдэг, бэлэгдэл, албан бичгийн хэвлэмэл хуудас болон банкны харилцах данстай байна.

1.7. Газар нь Чингэлтэй дүүрэг, Багатойруу-15, Нийслэлийн төр захиргааны 3 дугаар байрны 12 давхарт байрлана.

Хоёр. Удирдлага зохион байгуулалт

2.1. Газрын бүтэц, орон тооны хязгаарыг Нийслэлийн Засаг дарга бөгөөд Улаанбаатар хотын Захирагч тогтоож, даргыг томилж, чөлөөлнө.

2.2. Газрын орлогч даргыг Нийслэлийн Засаг дарга бөгөөд Улаанбаатар хотын Захирагчтай зөвшилцсөний үндсэн дээр Газрын дарга томилж, чөлөөлнө.

2.3. Газар нь үйл ажиллагаагаа Нийслэлийн Засаг дарга бөгөөд Улаанбаатар хотын Захирагчийн удирдлагын дор явуулж ажлын тайланг тавьж ажиллана.

2.4. Газрын дарга нь байгууллагын хөдөлмөрийн дотоод журам, цалингийн хэмжээ, урамшууллын журмыг тогтоож мөрдүүлэх ба ажилтнуудыг томилж, чөлөөлнө.

2.5. Газрын дарга нь эрх хэмжээнийхээ хүрээнд Монгол Улсын хууль тогтоомжид нийцүүлэн тушаал гаргаж, байгууллагын эд хөрөнгийн бүрэн бүтэн байдлыг хангаж, үйл ажиллагааныхаа зорилгод ашиглаж, эзэмшинэ.

2.6. Газрын дарга /түүний эзгүйд орлогч дарга/ газрыг төлөөлөн бусад байгууллагатай харилцаж, өөрийн бүрэн эрхэд хамаарах аливаа асуудлыг хууль тогтоомжийн хүрээнд шийдвэрлэнэ.

2.7. Газрын зорилт, чиг үүрэгтэй холбогдсон асуудлыг хэлэлцэх, зөвшилцөх үүрэг бүхий даргын дэргэдэх зөвлөлийг ажиллуулж болно. Зөвлөлийн гишүүд гагцхүү зөвлөх эрхтэй байна. Зөвлөлийн бүрэлдхүүн, ажиллах журмыг газрын дарга батлана.

2.8. Газрын даргын эрх, үүрэг, хариуцлага, цалин хөлс, урамшуулал болон бусад харилцааг гэрээгээр зохицуулж энэхүү гэрээг нийслэлийн Өмчийн харилцааны газар, үйл ажиллагааны чиглэлээр төсвийн ерөнхийлөн Захирагчтай гэрээ байгуулан ажиллана.

2.9. Газрын дарга нь төсвийн байгууллагын, удирдлага санхүүжилтын тухай хуулийн 19 дүгээр зүйлд заасны дагуу үр дүнгийн гэрээнд тусгасан бүтээгдхүүнийг Нийслэлийн Засаг даргад нийлүүлэн төсвийг зарцуулна.

Гурав. Газрын үүрэг

3.1. Газар нь Монгол улсын Засгийн газрын болон Нийслэлийн Засаг даргын үйл ажиллагааны хөтөлбөр, түүнийг хэрэгжүүлэх арга хэмжээний төлөвлөгөө, тухайн жилийн нийгэм эдийн засгийн зорилтуудыг хэрэгжүүлэхэд үйл ажиллагаагаа чиглүүлнэ.

3.2. Холбогдох хууль тогтоомж, Нийслэлийн Иргэдийн Төлөөлөгчдийн Хурлын тогтоол, Засаг даргын захирамж, тухайн оны нийслэлийн нийгэм, эдийн засгийн зорилт, Засаг даргын үйл ажиллагааны хөтөлбөрийн биелэлтийг улирал, хагас, бүтэн жилээр үнэн бодитой гаргана.

3.3. Нийслэлийн авто замын санг бүрдүүлж эх үүсвэрийг нэмэгдүүлэх, авто зам, замын байгууламжийг барих, засварлах, арчлан хамгаалах, ашиглалтад хяналт тавих, гэнэтийн болон байгалийн гамшгийн улмаас авто зам, замын

байгууламжид гарсан эвдрэл саатлыг засварлан сэргээх ажлыг удирдан зохион байгуулах /батлагдсан санхүүжилтын хүрээнд/, авто замын үйлдвэрлэлийн баазыг бэхжүүлэх, чанарын болон технологийн хяналтыг хэрэгжүүлж ажиллана.

3.4. Нийслэлийн нутаг дэвсгэр дээр авто зам, замын байгууламжийг барих, засварлах, арчлан хамгаалах, хайгуул зураг төслийн ажил эрхлэх аж ахуйн байгууллагад тусгай зөвшөөрөл олгоход болон цуцлахад санал өгч, авто замын салбарт зах зээлийн харилцааг төлөвшүүлэх, өмчийн бүх хэлбэрийн аж ахуйн нэгжүүдийн шударга өрсөлдөх нөхцлийг бүрдүүлнэ.

3.5. Нийслэлд баригдсан авто зам, замын байгууламжийг ашиглалтанд хүлээн авч, нэгдсэн данс бүртгэлд тусган паспортжуулан мэдээллийн санг байгуулж, шаардлагатай мэдээллийг шинэчлэн, Нийслэлийн Засаг даргын Тамгын газарт болон холбогдох байгууллагуудад тухай бүр гарган өгч ажиллана.

3.6. Авто зам, замын байгууламжид техник ашиглалтын түвшин тогтоох болон зам тээврийн ослын судалгаа, замын хөдөлгөөний эрчмийн тооллого хийж, замын мэдээллийн санд оруулан авто замын сүлжээний менежмент, төлөвлөлт болон засвар арчлалтын ажилд ашиглана.

3.7. Авто зам, замын байгууламжийг барих, засварлах, арчлан хамгаалах, ашиглалтад хяналт тавих, авто замын материаллаг баазыг бэхжүүлэх ажлыг зохион байгуулж, барилга засвар, арчлалтын ажлыг чанартай гүйцэтгүүлэх, санхүүжүүлэх, байнгын ашиглалтад хүлээн авч, цаашид арчлан хамгаалагчийг тогтоох, эдгээр ажлын зардлын бүтцэд шинжилгээ хийх болон технологийн үйл ажиллагааг боловсронгуй болгох санал төсөл боловсруулна.

3.8. Авто замын сүлжээний төлөвлөлтийн болон авто зам, замын байгууламжийг барих, засварлах, арчлан хамгаалах, ашиглалтад хяналт тавих ажлуудтай холбогдсон стандарт, норм, нормативийг хот төлөвлөлтийн болон байгаль орчин, авто замын хөдөлгөөний аюулгүй байдлын шаардлагыг хангахуйцаар боловсруулах, зохих журмын дагуу батлуулахад оролцон, биелэлтийг хэрэгжүүлэн ажиллана.

3.9. Нийслэлийн захиалгаар авто зам, замын байгууламжийг шинээр барих, өргөтгөх, засварлах ажлын техникийн даалгаврыг батлуулан, түүний дагуу зураг төслийг захиалан хийлгэнэ.

3.10. Газар нь орлогоороо зарлагаа нөхөж ажиллах бөгөөд хөрөнгө, санхүүгийн чадавхиа нэмэгдүүлэх, бизнесийн төлөвлөгөө гарган аж ахуйн тооцоон дээр ажиллан, захиалагчаар ажиллаж буй авто зам, замын байгууламжийн барилга угсралт, засварын ажлын техник хяналтын зардал, хотын доторх зам талбайн түрээсийн төлбөр, авто замын материалын үйлдвэрлэл, судалгаа шинжилгээний болон бусад ажил үйлчилгээний орлогоос үйл ажиллагааныхаа зардлыг нөхөх зарчмаар ажиллана.

3.11. Нийслэлд авто зам, замын байгууламжийг барих, засварлах, арчлан хамгаалах, хөдөлгөөн зохицуулах тэмдэг тэмдэглэгээ, гэрэл дохионы үйлдвэрлэл, авто замын ус зайлуулах байгууламж, материал үйлдвэрлэл, лабораторийн ажил эрхэлдэг төрийн өмчит компаниудын үйл ажиллагааг мэргэжлийн удирдлагаар хангаж, дараах хэлбэрээр харилцаж ажиллана.

а/ Төрийн өмчит компаний захирлыг ажилд томилох, чөлөөлөхөд мэргэжлийн байгууллагын хувьд санал өгнө.

б/ Компаниудын материаллаг баазыг бэхжүүлэх, техник технологи, инженер техникийн ажилчдаар бэхжүүлэх, хувьчлах асуудлыг төлөвлөн шийдвэрлэхэд оролцоно.

в/ Салбарын чиглэлээр гадаадын зээл тусламжийн хөрөнгөөр хэрэгжүүлэх төсөл арга хэмжээ, гадаад оронд туршлага судлах, суралцах ажлыг нэгтгэн зохион байгуулж энэ асуудлаар гадаадад ажиллах мэргэжилтнүүдийг томилох, ажлын гүйцэтгэлийг дүгнэж ажиллана.

г/ Нийслэлийн авто зам, замын байгууламж, хөдөлгөөн зохицуулах тэмдэг, тэмдэглэгээ, гэрэл дохионы барилга, засвар арчлалт, хамгаалалтын болон цаг үеийн асуудлаар сард шаардлагатай үед шуурхай зөвлөгөөн зохион байгуулж ажиллана.

3.12. Улаанбаатар хотын авто замын сүлжээг хөгжүүлэх, салбарын бүтэц зохион байгуулалтыг сайжруулах, мөрдөгдөж буй эрх зүйн актуудыг боловсронгуй болгох санал боловсруулна.

3.13. Хотын хөгжлийн бодлого, төлөвлөлт, авто замын сүлжээг хөгжүүлэх мастер төлөвлөгөөг үндэслэн авто зам, замын байгууламжийг барьж байгуулах тооцоо судалгаа, техник эдийн засгийн үндэслэл, хайгуулын ажлын зураг тослийг төлөвлөгөөнд тусгуулан, урьдчилан боловсруулж ажиллана.

3.14. Нийслэлийг хөгжүүлэх ерөнхий төлөвлөгөө, авто замын сүлжээг хөгжүүлэх мастер төлөвлөгөөг үндэслэн тухайн нутаг дэвсгэр, хорооллын замын сүлжээний нарийвчилсан төлөвлөлт боловсруулан, хянуулж хэрэгжүүлэх ажлыг зохион байгуулна.

3.15 Нийслэлийн нутаг дэвсгэр дээрх авто зам, замын байгууламжид жил бүр дулааны улирал эхлэхээс өмнө тогтоосон журам, технологийн зааврын дагуу үзлэг, тооллого явуулж, засвар арчлалтын ажлын төлөвлөгөөнд тусган хэрэгжүүлнэ.

3.16. Тухайн жилийн замын сангийн хөрөнгийн хуваарилалтын талаар санал боловсруулж замын зөвлөлтэй зөвшилцсөний үндсэн дээр Нийслэлийн Засаг даргын Тамгын газарт урьдчилан хянуулан, Нийслэлийн Засаг даргад өргөн барьж, шийдвэрийн биелэлтийг зохион байгуулна.

3.17. Нийслэлийн замын санг бүрдүүлэх, хөрөнгийн эх үүсвэрийг нэмэгдүүлэх болон замын сангийн задаргааны талаар тооцоо судалгаа хийж холбогдох газруудад оруулан шийдвэрлүүлэх, замын сангийн зөвлөлтэй хамтран замын санг төвлөрүүлэн хуваарилах, зарцуулах, гүйцэтгэлд хяналт тавих ажлыг хэрэгжүүлж, тайлан мэдээг холбогдох байгууллагад гаргаж өгнө.

3.18. Улаанбаатар хотын захиалгаар ажил гүйцэтгэх хүсэлт гаргасан авто зам, замын байгууламжийг барих, засварлах зураг төсөл зохиох, зөвлөхийн үйлчилгээ эрхлэх тусгай зөвшөөрөлтэй аж ахуйн нэгж, байгууллага, иргэдийн санхүү эдийн засаг, үйл ажиллагааны мэдээ тайланг нэгтгэн судалгаа дүгнэлт хийж үйл ажиллагааг нь мэргэжлийн төвшинд хүргэх механизм бүрдүүлж, хэрэгжүүлэх ажлыг зохион байгуулна.

3.19. Авто зам, замын байгууламжийн барилга, засвар арчлалтын үйлчилгээ, материаллаг бааз, боловсон хүчний хангалт, үйл ажиллагааны талаар шаардлагатай мэдээллийн сан бий болгох, холбогдох аж ахуйн нэгж,

байгууллага, иргэдэд зам, тээврийн сүлжээтэй холбогдолтой мэдээ, мэдээлэл, шинэ технологи, хууль тогтоомж, норм норматив, стандарт, олон улсын гэрээ хэлэлцээр, конвенцийн талаархи мэдээллээр хангаж, арга зүйн зөвлөгөө өгч ажиллана.

3.20. Нийслэлийн авто замын салбарын аж ахуйн нэгж байгууллагын мэргэжлийн боловсон хүчний хэрэгцээг тодорхойлж, зам барилга, засвар арчлалтын ажил эрхлэгчдийг мэргэшүүлэх, мэргэжлийн зэргийг дээшлүүлэх семинар сургалт зохион байгуулах, мэргэжлийн зөвлөгөө тусламж үзүүлнэ.

3.21. Нийслэлийн шалган бүртгэх товчоодын байршиллыг оновчтойгоор тогтоож, үйл ажиллагааг нь эрхлэн гүйцэтгэнэ.

3.22. Нийслэлийн авто замын сүлжээг хөгжүүлэх талаар олон улсын байгууллага, гадаад орнуудтай байгуулсан гэрээ хэлэлцээр, Монгол улсын нэгдэн орсон конвенциэр хүлээсэн үүргийг хэрэгжүүлэх ажлыг зохион байгуулна.

3.23. Нийслэлийн авто замын сүлжээг хөгжүүлэх, тус газрын боловсон хүчнийг мэргэшүүлэх зэрэг асуудлаар бусад орны туршлагыг судлах, хамтран ажиллах гадаад харилцааны чиг бодлогыг тогтоож, хэрэгжүүлнэ.

3.24. Нийслэлийн авто замын салбарын ажлын талаарх мэдээлэл, ололт амжилт, зөрчил дутагдал, өөрчлөлтийн тухай олон нийтэд мэдээлж, сурталчлах ажлыг зохион байгуулна.

3.25. Авто зам, замын байгууламжийн барилга, засвар арчлалтын ажлын зохион байгуулалт болон хөдөлмөр хамгаалалтын талаар арга зүйн туслахаа үзүүлж, энэ талаарх хууль тогтоомж, заавар, журмын биелэлтэд хяналт тавина.

3.26. Авто замын орон тооны бус байцаагч ажиллуулж, авто замын хуулийг хэрэгжүүлэх, хууль дүрэм зөрчиж авто зам, замын байгууламжийг эвдлэн сүйтгэж, зүй бус харьцаж байгаа аливаа үйл ажиллагааг богино хугацаанд илрүүлж, хохирлыг арилгуулан засч залруулах үйл ажиллагаа явуулж, энэ чиглэлийн ажилд байнгын хөдөлгөөнт эргүүл хяналт ажиллуулна.

3.27. Авто зам, замын байгууламжийн бүрэн бүтэн байдал, ашиглалтын талаар нийслэлийн дүүргүүд, хяналтын болон замын цагдаагийн газар, бусад байгууллагуудтай хамтран ажиллана.

3.28. Монгол улсын Авто замын тухай хууль тогтоомж, норм стандарт, бусад эрх зүйн актын шаардлагыг хэрэгжүүлээгүй этгээдэд хууль тогтоомжид заасан журмын дагуу хариуцлага тооцно.

3.29. Авто замын барилга, засвар арчлалтын ажилд хэрэглэх бүх төрлийн материал, бэлэн бүтээгдэхүүнд туршилт шинжилгээ хийж дүгнэлт гаргаж ажиллана.

3.30. Газрын даргын нийтлэг хэм хэмжээ тогтоосон тушаалыг тухай бүр Нийслэлийн Засаг даргын Тамгын газрын холбогдох хэлтэсүүдэд хүргүүлж хянуулна.

3.31. Холбогдох хууль тогтоомж, газрын дотоод журмын дагуу ажилтнуудын нийгмийн асуудлыг шийдвэрлэнэ.

3.32. Байгууллагын хэмжээнд сахилга, дэг журам, ажилтнуудын ёс зүйн хэм хэмжээг сахиулж, ажлын цаг ашиглалт, өмч хөрөнгийн хадгалалт хамгаалт, хөрөнгийн зарцуулалтанд хяналт тавьж ажиллана.

Дөрөв. Газрын эрх

4.1. Газрын өмч хөрөнгийг холбогдох хууль тогтоомж, энэхүү дүрэмд нийцүүлэн эзэмшин, ашиглаж, захиран зарцуулна.

4.2. Авто замын салбарын холбогдолтой асуудлаар салбарын сайд болон Нийслэлийн Засаг даргын хамтарсан тушаал, захирамжийн төслийг боловсруулал, Нийслэлийн Засаг даргын Тамгын газарт танилцуулан хамтарсан тушаал, захирамж гаргуулж хэрэгжүүлнэ.

4.3. Авто замын ажил үйлчилгээ эрхлэгч аж ахуйн нэгж байгууллагад бүртгэл, хяналт шалгалт хийж ажиллах, тэдэнд шаардлагатай мэдээ мэдээллээр хангах үйлчилгээг төлбөртэй явуулж болно.

4.4. Газар нь гадаад, дотоодын холбогдох байгууллагатай харилцаж, Нийслэлийн Засаг даргын болон холбогдох эрх бүхий байгууллагын зөвшөөрлийн дагуу гэрээ хэлцэл хийж, хамтран ажиллана.

4.5. Авто зам, замын байгууламжийн барилга, өргөтгөл, шинэчлэлт, засварын ажлын зургийн даалгаврыг боловсруулж, батлуулна.

4.6. Нийслэлийн авто замын салбарын төрийн болон төрийн өмчийн оролцоотой аж ахуйн нэгжүүдийг хувьчлах, шинээр бий болгох, татан буулгах, тэдгээрийн үйлдвэрийн баазыг өргөтгөн бэхжүүлэх технологийн тоног төхөөрөмж, машин техникийг шилжүүлэх, устгах зэрэг асуудлуудын талаар санал гаргаж ажиллана.

4.7. Нийслэлийн төрийн өмчийн аж ахуйн нэгж байгууллагуудад өмчийг хүлээлгэн өгч эзэмшүүлэх асуудлаар төрийн өмчийн төлөөллийг хэрэгжүүлэгч холбогдох байгууллагад саналаа өгнө.

4.8. Нийслэлийн Засаг дарга бөгөөд Улаанбаатар хотын Захирагчтай зөвшилцсөний үндсэн дээр газар нь өөрийн харъяа нэгжийг байгуулан ажиллуулж болно.

4.9. Нийслэлийн өмчийн авто зам, замын байгууламжийг нэгдсэн данс бүртгэлдээ тусган авах, данснаас хасах, харьяаллыг нь өөрчлөн байгууллага хувь хүнд гэрээлэх, түрээслэх асуудлыг холбогдох байгууллагаар шийдвэрлүүлэн хэрэгжүүлнэ.

4.10. Улаанбаатар хотын нутаг дэвсгэрт Авто замын тухай хууль тогтоомжийг хэрэгжүүлэн ажиллана.

4.11. Авто зам, замын байгууламжийн барилга засвар арчлалтын ажлыг батлагдсан зураг төсөл технологийн горим зөрчиж, чанаргүй гүйцэтгэсэн, авто зам, замын байгууламжид гэмтэл учруулсан тохиолдолд буруутай этгээдийн зардлаар дахин хийлгэх ба зөрчил дутагдлыг арилгуулах, барилгын ажлыг зо.соох хүртэл арга хэмжээ авна.

4.12. Улсын төвлөрсөн болон орон нутгийн төсөв, гадаадын зээл тусламжийн хөрөнгөөр авто зам, замын байгууламж барих, засварлах, арчлан хамгаалах ажлыг захиалан хийлгэнэ.

4.13. Авто зам, замын байгууламжийг барих, өргөтгөн шинэчлэх, засварлах, арчлан хамгаалах ажлын болон зураг төсөл боловсруулах гүйцэтгэгчийг сонгон шалгаруулах ажлыг зохион байгуулна.

4.14. Гүйцэтгэгч байгууллага тухайн санхүүжилтыг зориулалтын бус зүйлд зарцуулснаас гарсан хохирлыг арилгуулахын тулд банк, санхүү, хуулийн байгууллагаар хянуулж шалгуулна.

4.15. Стандартын шаардлага хангаагүй, чанарын баталгаагүй материал ашиглахыг хатуу хориглож, шаардлагатай бол эрх бүхий байгууллагын дүгнэлтийг гаргуулна.

4.16. Авто зам, замын байгууламжид гэмтэл учруулж болзошгүй овор хэмжээ ихтэй ачаа тээвэрлэж эсвэл хүнд даацын болон гинжит дугуйт тээврийн хэрэгслээр Улаанбаатар хотын авто зам, замын байгууламжаар зорчихдоо тус газраас зөвшөөрөл авна.

4.17. Нийслэлийн нутаг дэвсгэрт бүх төрлийн инженерийн шугам сүлжээ, тохижилтын ажил гүйцэтгэх үедээ авто зам, замын байгууламжийг гэмтээх, сэтлэх нөхцөлд тус газар нь зөвшөөрөл олгох, улмаар нөхөн сэргээх ажлын зардлыг тухайн ажлын төсөвт тусгуулан мэргэжлийн байгууллагаар гүйцэтгүүлнэ.

4.18. Байгалийн гамшиг, гэнэтийн аюул, бэрхшээлээс шалтгаалан авто зам, замын байгууламжинд эвдрэл саатал гарч түүнийг түргэн засварлах шаардлага гарсан үед нийслэлийн аж ахуйн нэгж, байгууллага иргэдээс тээвэр, холбооны хэрэгсэл эд хөрөнгийг нөхөн олговортойгоор гаргуулах болон авто зам, замын байгууламжийг хэвийн байдалд оруулах ажлыг холбогдох байгууллагуудтай хамтран зохион байгуулна.

4.19. Газар нь өөрийнхөө үйл ажиллагааны ашгаас ажилтнуудын нийгмийн асуудлыг шийдвэрлэж болно.

Тав. Эд хөрөнгө, санхүүгийн бүртгэл, хяналт

5.1. Газар нь Монгол улсын хууль тогтоомжийн дагуу аж ахуйн нэгж байгууллагын татвар төлнө.

5.2. Газар нь анхан шатны бүртгэлийн баталгаажсан баримтыг үндэслэн дэлгэрэнгүй ба хураангуй бүртгэл хөтлөн, гайлан тэнцлийг улирлаар гаргаж, Татварын алба, санхүүгийн байгууллагад тушаана.

5.3. Газар нь Монгол улсын хууль тогтоомжийн дагуу хөрөнгийн элэгдэл хорогдлын шимтгэлийг тооцно.

5.4. Газрын санхүүгийн үйл ажиллагаанд хяналт тавих үүргийг хууль тогтоомжид заасан байгууллага хэрэгжүүлнэ.

5.5. Газрын удирдлага нь газрын үйл ажиллагаанд хөндлөнгийн шалгалт хийхэд шаардагдах бүх баримт материалаар хангана.

5.6. Газрын тооцоо, тайлангийн мөнгөн дүнг төгрөгөөр илэрхийлнэ. Бэлэн мөнгө болон банкинд хадгалагдаж буй бусад мөнгөн хөрөнгө, түүнчлэн орлого, зарлага, төлөгдөөгүй өр зэрэг нь анх оруулсан валютын хэлбэрээр байна. Нягтлан бодох бүртгэлийн бичилт хийх зорилгоор төгрөгт хөрвүүлэхэд Монгол банкны тухайн үеийн албан ёсны ханшаар тооцно.

5.7. Үндсэн хөрөнгөнд хамаарах эд хөрөнгө олж авах, төрийн өмчийн бус этгээдэд эзэмшүүлэх, ашиглуулах болон худалдах, хувьчлахдаа Төрийн болон орон нутгийн өмчийн тухай хуулийг баримтална.

Зургаа. Байгуулах, бүртгэх, өөрчлөх, татан буулгах

6.1. Нийслэлийн Засаг дарга бөгөөд Улаанбаатар хотын Захирагч өөрийн эрх мэдлийн хүрээнд газрыг үүсгэн байгуулах, өөрчлөх, татан буулгах асуудлыг шийдвэрлэнэ.

Долоо. Хариуцлага

7.1. Газрын дарга, ажилтнууд нь байгууллагын дүрэм, хөдөлмөрийн дотоод журмаар хүлээсэн үүргээ хангалтгүй биелүүлсэн тохиолдолд холбогдох хууль тогтоомжийн дагуу хариуцлага хүлээнэ.

Найм. Бусад

8.1. Энэхүү дүрэмд Нийслэлийн Засаг даргын захирамжаар нэмэлт өөрчлөлт оруулж болох бөгөөд тэдгээр нь дүрмийн салшгүй хэсэг болно.

8.2. Энэхүү дүрэмд оруулсан нэмэлт өөрчлөлтийг тухай бүр зохих эрх бүхий байгууллагад мэдэгдэж бүртгүүлнэ.

-----oOo-----